

Supervizor za Brčko traži smjenu direktora i Upravnog odbora “Majevica”

Supervizor za Brčko Henry L. Clarke je zatražio od Siniše Kisića, gradonačelnika Brčko Distrikta, da smijeni gospodina Boška Maričića, direktora ODP “Majevica” Brčko, i Upravni odbor “Majevica” nakon što je tužilaštvo tražilo potvrđivanje optužnice protiv gospodina Maričića. Optužnica tereti Maričića za zloupotrebu položaja i neizvršavanje službene dužnosti time što je odobravao nezakonitu izgradnju stambenih objekata na imovini “Majevica” za svoju, kao i za drugih 30 porodica, u periodu između januara 2000. god. i maja 2002. god., a bez uplate bilo kakvih naknada za zemljište ili pribavljanja dozvola za gradnju.

“Majevica” je javno preduzeće. Direktor i Upravni odbor “Majevica”, kao i svi direktori i Upravni odbori javnih preduzeća, su odgovorni da upravljaju preduzećem i imovinom preduzeća u korist Distrikta. Umjesto toga, gospodin Maričić je, prema optužnici, iskoristio imovinu preduzeća i dozvolio nezakonitu izgradnju objekata. Gospodin Maričić nije smio dozvoliti izgradnju, ili je trebao tražiti od organa vlasti da spriječe tu izgradnju. On to nije učinio. Upravni odbor nije preduzeo mjere u cilju zaustavljanja nezakonite izgradnje, niti je adekvatno nadgledao aktivnosti gospodina Maričića po ovom pitanju.

Korištenje javne imovine u privatne svrhe bez ovlaštenja predstavlja propust u zaštiti javnog interesa. Zajednički propust gospodina Maričića i Upravnog odbora u zaštiti javne imovine ukazuje na njihovu nespremnost da izvrše svoje obaveze, kao i njihovu nepodobnost da nastave rad na tim radnim mjestima.

Zahtjev supervizora ne prejudicira krivicu ili nevinost gospodina Maričića po optužbama koje su podignute protiv njega. O tome će se odlučiti u sudskom postupku. Međutim, zbog ozbiljnosti optužbi, ne može se dozvoliti da gospodin Maričić i Upravni odbor "Majevice" ostanu u bilo kakvoj vezi sa "Majevicom".

Ovo je u skladu sa standardom kolektivne odgovornosti utvrđenim prošle godine kada su smijenjeni direktor i Upravni odbor "Palisa". U avgustu 2001. god. supervizor je tražio od gradonačelnika da smijeni direktora i Upravni odbor "Palisa", drugog javnog preduzeća, kada su napravili sumnjive finansijske transakcije koje su mogle dovesti do nezakonite prodaje preduzeća.

Optužnica protiv Maričića koju je podiglo tužilaštvo je još jedan znak da se vladavina prava može i da će se sprovoditi u Distriktu. Tužilaštvo je sprovelo istragu na osnovu informacija o navodnoj nezakonitoj izgradnji na imovini "Majevice". Nakon istrage, javni tužilac je podnio optužnicu Osnovnom sudu Brčko Distrikta na potvrdu. Sud može potvrditi optužnicu nakon saslušanja, prilikom kojeg će gospodin Maričić imati priliku da odgovori na optužbe podnesene protiv njega. Saslušanje za potvrđivanje optužnice je bilo zakazano za 19. juli 2002. god. i ponovo za 24. juli 2002. god. u Osnovnom sudu, ali se gospodin Maričić nije pojavio ni na jednom od saslušanja navodeći zdravstvene razloge.